

## ■ GLOSSA

# Vuls ti Tes Auto u vuls Ti Tia festa?

DA GISULA TSCHARNER

Tuts din ch'i saja uss in problem dad ir ordvart la saira, pervi da las promillas, ins na sappia gnanca baiver insatge dretg, e la suletta biera lubida na gustia betg pli, mintga sitg saja cumpagnà da la visiun d'in bavriel per sufflar anen. E cur che l'amia frestga avess gust da giudair cun Tai anc in magiel da vin grev-sensual u in schämpis frestg... gea, lura stoss Ti Ta decider tranter l'ura stellida dal mument regalà e l'ura nunstellida dal viadi automobilistic. Tge scelta perversa, pelvair!

Il s ustiers e las ustieras (prids davent quels da Luven e Flond, in bravo a quels!) sa lamentan da spersas d'entradas – sco sch'il consum d'alcool avess da spenderar l'economia gastronomica... è il problem propi l'alcool e la dependenza dad el? Jau smin insatge auter, numnadain che l'auto e la dependenza dad el saja il problem.

Forsa han ils legislatur gè in'idea tut cuntraria cun il sbassament da las promillas (d'alcool) permess: Betg ina reducziun



da las festivitats, ma plitost la reducziun dals viadis cun auto?

Jau per mia part renunziel 10 giadas pli gugent a la libertad dad ir cun l'agen crosch, e quai en favur a la libertad da far festa! Er pervi da lez vin grev spontan che animescha anc il discurs profund cun collegas. I nun è propi l'alcool blut ch'jau defendel, na, igl è la festa cun ses spiert avert e nunlimità, la festa sco oasa tranter ils mintgadis. Quai defendel jau. Er sch'igl è dad ir a chasa a pe suenter. Ubain sch'igl è da guardar a l'ultim termin dal Bus-taxi; e, forse sai jau gia er giaschair tar amis. Festas fortofitgeschan la societad.